

27 OCT 2001

MAHATHIR-BUSH

MAHATHIR SIFATKAN PERTEMUAN DGN BUSH SBG MESRA

PETALING JAYA, 27 Okt (Bernama) -- Perdana Menteri Datuk Seri Dr Mahathir Mohamad menyifatkan pertemuannya dengan Presiden AS George W. Bush di Sidang Kemuncak Kerjasama Ekonomi Asia Pasifik (APEC) di Shanghai baru-baru ini sebagai mesra.

"Kami serasi antara satu sama lain. Ia (pertemuan itu) tidaklah serius sepanjang masa. Kadang-kadang saya ada juga menyelitkan beberapa jenaka tetapi saya tidak ingat tentang apa," Dr Mahathir berkata demikian ketika diminta mengulas kenyataan oleh pegawai-pegawai AS bahawa Bush mendapati beliau seorang yang pandai berjenaka di pertemuan itu.

"Ia bukanlah satu pertemuan yang begitu rasmi walaupun kami ada berbincang beberapa perkara serius. Saya rasa beliau (Bush) sangat mesra," katanya kepada pemberita di sini, hari ini, selepas pulang daripada kunjungan selama sembilan hari ke China, Korea Selatan dan Jepun.

Dr Mahathir menyifatkan mesyuarat Kerjasama Ekonomi Asia Pasifik (APEC) di Shanghai kali ini sebagai suatu yang bermakna.

Beliau berkata anggota-anggota APEC tidak banyak mendesak pada persidangan kali ini dan isu-isu seperti globalisasi, pembukaan pasaran dan tarikh sasaran bagi pembukaan pasaran tidak dibangkitkan.

"Sebaliknya kami banyak berbincang mengenai keganasan dan tentang mustahaknya untuk bekerjasama," kata Dr Mahathir yang menambah beliau mengusulkan pandangan negara-negara membangun dan keperluan untuk mengguna pakai falsafah "Memakmurkan Jiran". -- BERNAMA

MSL SHY ZK